

ՀՈՒՇԱԳԻՐ

ՀՀ ԱԶԳԱՅԻՆ ԱՆՎՏԱՆԳՈՒԹՅԱՆ ԾԱՌԱՅՈՒԹՅԱՆ ԳԻՏԱՌԻՍՈՒՄՆԱԿԱՆ ԿԵՆՏՐՈՆԻ ԵՎ ՀՀ ԳԻՏՈՒԹՅՈՒՆՆԵՐԻ ԱԶԳԱՅԻՆ ԱԿԱԴԵՄԻԱՅԻ ԱՐԵՎԵԼԱԳԻՏՈՒԹՅԱՆ ԻՆՍՏԻՏՈՒՏԻ ՄԻՋԵՎ ՀԱՄԱԳՈՐԾԱԿՑՈՒԹՅԱՆ ՄԱՍԻՆ

Համագործակցության սույն հուշագիրը (այսուհետ՝ Հուշագիր) կնքվում է ՀՀ ազգային անվտանգության ծառայության գիտաուսումնական կենտրոնի (այսուհետ՝ Կենտրոն) և ՀՀ գիտությունների ազգային ակադեմիայի արևելագիտության ինստիտուտի (այսուհետ՝ Ինստիտուտ) միջև (այսուհետ նաև՝ Կողմեր):

Հաշվի առնելով Ինստիտուտի գիտահետազոտական և գիտակրթական աշխատանքների մեծ փորձը և հնարավորությունները,

հիմք ընդունելով Կենտրոնի և Ինստիտուտի միջև ձևավորված արդյունավետ համագործակցությունը,

նկատի առնելով այն ներուժը, որը Կենտրոնում կուտակվել է ազգային անվտանգության հարցերով գիտական հետազոտություններ իրականացնելու, ազգային անվտանգության ծառայության կադրեր պատրաստելու և վերապատրաստելու ուղղությամբ,

կարևորելով ազգային անվտանգության մարմինների գործունեության գիտական ապահովման անհրաժեշտությունը,

ընդունելով համագործակցության հարցում փոխադարձ շահագրգռվածության առկայությունը,

արժևորելով Կողմերի համագործակցության ակնկալվող արդյունքները,

նպատակ ունենալով սահմանել համագործակցության ուղղությունները, ինչպես նաև կանոնակարգել դրա պայմանները և եղանակները,

Կողմերը կնքեցին համագործակցության սույն Հուշագիրը հետևյալի մասին.

Հոդված 1. Համագործակցության ուղղությունները և եղանակները

Կողմերը համաձայնում են համագործակցել հետևյալ ուղղություններով և եղանակներով.

1.1. Ազգային անվտանգության ապահովման ոլորտին առնչվող պատմագիտական նյութերի վերլուծության և դրանց վերաբերյալ հիմնավորված եզրակացությունների կամ կարծիքների փոխանակման նպատակով իրականացնել հանդիպումներ, թեմատիկ լսումներ, սեմինարներ, աշխատանքային քննարկումներ և այլ գիտագործնական միջոցառումներ,

1.2. Գիտական, մասնագիտական գրականության, մեթոդական ձեռնարկների, աշխատությունների, պարբերականների և այլ նյութերի փոխանակում, համատեղ աշխատանքային խմբերի ձևավորում և Կողմերի լիազորված աշխատակիցների միջոցով փոխադարձ հետաքրքրություն ներկայացնող հարցերի վերաբերյալ քննարկումների անցկացում,

1.3. Ինստիտուտի գիտաշխատողների ներգրավում Կենտրոնում դասավանդվող առարկաների շրջանակներում առանձին թեմաներով դասախոսություններին, սեմինարներին, հանդիպումներին,

1.4. Կենտրոնի մասնագետների ներգրավում Ինստիտուտում անվտանգության հարցերով հետազոտվող առանձին թեմաներով դասախոսություններին, սեմինարներին, հանդիպումներին,

1.5. Անվտանգության հարցերով գիտական հետազոտությունների թեմատիկայի համատեղ մշակում և իրականացում,

1.6. Կենտրոնի աշխատակիցներին Ինստիտուտի ասպիրանտուրայի և դոկտորանտուրայի ընդունելության, որպես գիտական աստիճանի հայցորդ ձևակերպելու կազմակերպչական հարցերի լուծման, ինչպես նաև ատենախոսությունների մշակման և պաշտպանության ընթացքում մեթոդական աջակցություն,

1.7. Ինստիտուտի մագիստրատուրայի ուսանողներին ՀՀ ԱԱԾ-ի՝ օրենքով վերապահված գործառույթներին և Կենտրոնի աշխատանքներին ծանոթացում, ազգային անվտանգության մարմիններում ծառայության անցնելու կարգի պարզաբանում,

1.8. Սույն հոդվածով նախատեսված համագործակցության ուղղությունները սահմանող դրույթները չեն սահմանափակում Կողմերի համագործակցությունը փոխադարձ հետաքրքրություն ներկայացնող այլ բնագավառներում:

Հոդված 2. Ֆինանսական պարտավորությունները

2.1. Կողմերն ընդունում են, որ սույն Հուշագրի հիման վրա ծավալվող համագործակցության շրջանակներում չեն կարող առաջանալ ֆինանսական և այլ նյութական պարտավորություններ, բացառությամբ այն դեպքերի, երբ Կողմերը լրացուցիչ համաձայնագրերով հաստատում են նման պարտավորությունները համագործակցության որևէ ուղղությամբ իրականացվող համատեղ ծրագրի շրջանակներում:

2.2. Կողմերն առանձին դեպքերում Հայաստանի Հանրապետության օրենսդրությամբ սահմանված կարգով փոխադարձ համաձայնությամբ սույն հուշագրի Հոդված 1-ին մասով սահմանված կոնկրետ ուղղությունների հետ կապված ծառայությունները կարող են իրականացնել դրանցից յուրաքանչյուրի համար նախատեսված ֆինանսական բնույթի գրավոր համաձայնագրերով՝ կախված այս կամ այն Կողմի ուժերով իրականացվող աշխատանքների ծախսատարությունից:

Հոդված 3. Հուշագրի գործողության դադարեցումը կամ դրանում փոփոխությունների կատարումը

3.1 Հուշագրի գործողությունը կարող է դադարեցվել փոխադարձ համաձայնությամբ կամ Կողմերից մեկի ցանկությամբ՝ այդ մասին ոչ ուշ, քան 60 (վաթսուն) օր առաջ մյուս կողմին գրավոր ծանուցելով:

3.2. Հուշագրի գործողության դադարեցման դեպքում նախկինում Կողմերի կնքած և ֆինանսավորված լրացուցիչ համաձայնագրերը շարունակում են գործել մինչև դրանց

գործողության ավարտը, եթե Կողմերը փոխադարձ համաձայնությամբ այլ որոշում չեն կայացնում:

3.3. Հուշագրում փոփոխությունները կատարվում են փոխադարձ գրավոր համաձայնությամբ: Փոփոխություններ պարունակող փաստաթղթերը կցվում են Հուշագրին և կազմում են դրա բաղկացուցիչ մասը:

3.4. Հուշագրով նախատեսված համագործակցության շրջանակներում Կողմերը կարող են համատեղ ծրագրերի իրականացման նպատակով կնքել լրացուցիչ համաձայնագրեր, որոնք չեն կարող հակասել Հուշագրին:

Հոդված 4. Կողմերի միջև տարաձայնությունների կարգավորումը

Սույն Հուշագրի դրույթների մեկնաբանության հետ կապված տարաձայնությունները ենթակա են կարգավորման Կողմերի միջև բանակցությունների միջոցով:

Հոդված 5. Եզրափակիչ դրույթները

5.1. Հուշագիրը բացառիկ իրավունքներ չի վերապահում Կողմերից որևէ մեկին: Կողմերն ազատ են Հուշագրով նախատեսված համագործակցության առարկայի վերաբերյալ համաձայնագրեր և հուշագրեր կնքել այլ անձանց կամ մարմինների հետ:

5.2. Հուշագրին ուժի մեջ է մտնում ստորագրման պահից:

5.3. Հուշագիրը կազմված է երկու օրինակից, որոնք ունեն հավասար իրավաբանական ուժ: Յուրաքանչյուր կողմին տրվում է մեկական օրինակ:


5.4. Հուշագիրը ստորագրված է Երևան քաղաքում, 2021 թվականի մայիսի 26-ին:

ՀՀ ԱԱԾ գիտաուսումնական
կենտրոնի պետ,
գեներալ-մայոր

 Հ. Կարումյան

«26» մայիսի 2021թ.

ՀՀ ԳԱԱ արևելագիտության
ինստիտուտի տնօրեն,
պատմական գիտությունների
թեկնածու, դոցենտ

 Ռ. Ղազարյան

«26» մայիսի 2021թ.